

मार्निंग डोगरी न्यूज़ बुलेटिन, समें. 09.20 Hrs



Headlines

1. प्रधानमंत्री नरेन्द्र मोदी होरें पेरिस च फ्रांस दे राष्ट्रपति हुंदे कन्नै भारत ते फ्रांस दे मुख्ब कार्जकारी अधिकारिणं दे फोरम गी संबोधित कीता ते आखेआ जे भारत दिआं कारोबार मुआफक नीतियां, 2047 तगर विकसित भारत दे निर्माण लेई बत्त पदरी करडन।
2. गृह मंत्री अमित शाह होरें सब्बनें सुरक्षा एजेंसिएं गी निर्देश दित्ता जे ओहू जम्मू-कश्मीर च आतंकवाद दे खात्मे लेई आपूं-चै तालमेल बनाइयै कम्म करना बरोबर जारी रक्खन।
3. अखनूर सैक्टर च कब्ज़ा रेखा कश संदिग्ध आईईडी धमाके च फौज दे इक कैप्टन ते इक नाईक शहीद होई गे न। लेफ्टिनेंट गवर्नर मनोज सिन्हा होरें दौनें शहीदें गी श्रद्धांजलि अर्पित कीती।
4. मुख्बमंत्री ओमर अब्दुल्ला होरें बजट कोला पैहले बक्ख-बक्ख धडें कन्नै सलाह-सुत्तर आहले बैठक लाई।
5. एलजी मनोज सिन्हा होरें लोकें गी गुरू रविदास जयंती दिआं ममारखां दित्तिआं न।



PM-France

प्रधानमंत्री नरेन्द्र मोदी ते फ्रांस दे राष्ट्रपति इमैनुअल मैक्रों होरें कल संझा पेरिस च 14में भारत फ्रांस मुख्ब कार्जकारी अधिकारी मंच गी संबोधित कीता। दौनें नेताएं बपारिक सरबंघ मजबूत करने ते नमिणं काहडें गी बढावा देने दी बचनबद्धता दोहराई। इस दौरान दौनें मुख्बे दे कारोबारी खेत्तर दे प्रतिनिधिणं किट्टे आइए रक्षा, एयरो स्पेस, आर्टिफिशल इंटेलीजेंस, ढांचागत निर्माण ते लगातार ते टिकाऊ विकास दे खेत्तरें पर ध्यान केंद्रित कीता। प्रधानमंत्री होरें वैश्विक निवेश केंद्र दे तौरा पर भारत दे बढदे आकर्षण पर लौ पांदे होई स्थिर नीतिणं ते हाल दे आर्थिक सुधारें पर जोर पाया।

उनें आखेआ जे नियामक सुधार भारत दे आर्थिक शासन गी मता विश्वास आधारित ते कुशल बना रदे न। प्रधानमंत्री होरें फ्रांस दिणं कंनिणं गी रक्षा, उर्जा, अंतरिक्ष, फिनटेक ते सेहत सेवा आहले खेत्तरें च निवेश लेई साद्दा दित्ता।



Shah-JK

केंद्रीय गृह मंत्री अमित शाह होरें खूफिया जानकारियां रक्खने दे कम्मै च तकनीक दे इस्तेमाल पर जोर दित्ता ऐ। कल नमीं दिल्ली च जम्मू-कश्मीर दी मौजूदा सुरक्षा स्थिति दी समीक्षा गितै सद्दी गेदी इक उच्च सतह दी बैठक दी अध्यक्षता करदे होई अमित शाह होरें आखेआ जे आतंकवादिणं गी रपेआ पैसा उपलब्ध करोआने आहलें पर तक्क रक्खना, नशीले पदार्थें, ते आतंकवादिणं दा कारोबार करने आहलें पर नेडमी तक्क रक्खदे होई उंदी नकेल कसना ते जम्मू-

कश्मीर थवां आतंकवादी ढांचें गी पूरी चाल्ली खत्म करना प्रधानमंत्री नरेंद्र मोदी हुंदी सरकार दी प्राथमिकता ऐ। बैठक दौरान उनें सब्बनं सुरक्षा एजेंसिं गी आपूंचै तालमेल बनाइए कम्म करने पर जोर पाया। उनें सब्बनं गी सौहगा ते सतर्क रौहने लेई बी आखेआ। गृह मंत्री होरें केंद्री रिजर्व पुलस बल दी स्याले लेई कार्ययोजना दी बी समीक्षा कीती ते उनें उच्च अधिकारिं गी निर्देश दितता जे कुसै बी इलाके च उंदी पकड ते नियंत्रण च कोई कमी नेई रवै। उनें सी.आर.पी.एफ गी फौज ते जम्मू-कश्मीर पुलस कन्नै नेडमा तालमेल बनाइयै कम्म करने दे निर्देश बी दित्ते।

<><><><><><>

Jwan-IED

जम्मू जिले दे अखनूर सैक्टर च कल होए दे इक आईईडी धमाके च फौज दे इक कैप्टन सने कुल 2 फौजी शहीद होई गे। पिच्छले च'ऊं दिनें दरान जम्मू संभाग च आतंकवादिं आसेआ बन्ने पार कीती गेदी एहू त्रीऽ कार्रवाई ऐ। शहीद होए दे फौजिं दी पन्छान रांची, झारखंड दे बसनीक कैप्टन करमजीत सिंह बक्शी ते उत्तरवैहनी, सांवा दे बसनीक नाईक मुकेश सिंह मन्हास दे तौर पर कीती गेई ऐ। नाईक मुकेश सिंह मन्हास दा ब्याह औंदी 18 अप्रैल गी आर.एस. पुरा दे सतराईयां ग्रां दी इक कुडी कन्नै होना तय होए दा हा जिसलै के कैप्टन करमजीत सिंह हुंदा ब्याह बी इसै तरीक गी सैनिक कलोनी जम्मू दी इक फौजी डाक्टर कन्नै होना तय होए दा हा। लेफ्टिनेंट गवर्नर मनोज सिन्हा होरें इ'नें दौनें शहीदें गी श्रद्धांजलि अर्पित कीती ऐ।

<><><><><><>

IGP-Jammu

जम्मू दे आईजीपी भीम सेन तूती होरें कल सुंजवान जम्मू च कमांडो-एं गी सिखलाई देने आह्ले केन्द्र दा दौरा लाया ते उत्थे उपलब्ध सुविधाएं ते ढांचे दी मजूदा स्थिति दा जायजा लैता। इस मौके उप्पर उनें एहू निर्देश जारी कीते जे इस केन्द्र च मजूदा ढांचागत सुविधाएं दा दर्जा फौरी तौरा पर बधाया जा। आईजीपी होरें उत्थे तैनात अमले लेई आधुनिक सुविधाएं ते सिखलाई हासल करने आह्ले जवानें लेई भलेआं अज्जै कल्लै दिं तकनीकें दी जरूरत पर जोर पाया। इस मौके उप्पर उनें सिखलाई आह्ले मैदानें दा दर्जा बधाने, केन्द्र च रौहने-बाहने सरबंधी सुविधाएं ते उपकरणें वगैरा च बाह्वा करने दे बी निर्देश जारी कीते।

<><><><><><>

Mahakumbh

प्रयागराज दे महाकुम्भ च माघ महीने दी पुण्णैया दे मौके पर अज्ज विशेष स्नान जारी ऐ। इस विशेष स्नान दी बडी मती अध्यात्मिक महत्ता ऐ कीजे एहूदे कन्नै कल्पवास अनुष्ठान दी बी समाप्ति होई जंदी ऐ। इस वारी 10 लख शा बद् लोक कल्पवास करा रदे ना। परम्परा मताबक ऐसी मान्यता ऐ जे प्रयागराज च संगम दे कंडे कल्पवास करने कन्नै मोक्ष दी प्राप्ति हुंदी ऐ। एहूदी पच्छोक्कड़ै च उत्तर प्रदेश सरकार नै सुरक्षा दे पुख्ता बंदोबस्त कीते देन ते विशेष ट्रैफिक बवस्था बी कीती दी ऐ। दुनिया दा सब्बनं शा बड्डा आध्यात्मिक किट्टु महाकुम्भ मेला ऐगती 13 जनवरी गी शुरू होआ हा जेदे च हुनै तगर 46 करोड शा मते श्रद्धालुएं संगम च पवित्र चलोबी लाई लैती दी ऐ।

<><><><><><>

Annouement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां ना। इच्छुक आवेदक जेहूदी उमर 24 थमां 50 बरें दे बश्कार ऐ ते ओहू कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च

पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले-पैहले आइए दस्ती जमा करोआनी होगा। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

ते हुन बाकि दिएं खबरें कन्नै श्रुति खजूरिया।

CM-Pre Budget

मुखमंत्री ओमर अब्दुल्ला होरें बजट शा पैहले बक्ख-बक्ख सरबंधत धड़ें कन्नै सलाह-सुत्तर आहले दौर गी बरोबर जारी रक्खदे होई कल श्रीनगर च इक बैठक लाई। इस दरान बक्ख-बक्ख सरबंधत धड़ें जि'आं उद्योगपतिएं, कारोबारिएं, होटलें दे मालकें, ट्रैवल ते टूर आपरेटरें, सैलसफा कन्नै जुडे दे लोकें, शिक्षाविद्, खड्डारिएं, करसानें, बागवानें ते उद्यमिएं सनें, बड्डे कारोबारी संगठनं दे नुमाइदें जम्मू-कश्मीर दे औंदि बजट लेई अपने विचार ते मशवरे सांझे कीते। मुखमंत्री होरें आखेआ ऐ जे सलाह-सुत्तर आह्लियां एह बैठकां, बड़ी महत्वपूर्ण ना। बैठक दरान ओमर होरें सब्बनं सरबंधत धड़ें दे विचारें-सुझाएं गी धरोइयै सुनेआ ते आखेआ जे उंदी सरकार लोकें दिएं आसैं-मेदें मूजब बजट पेश करने लेई वचनबद्ध ऐ।

<><><><><><>

JK-Assembly

जम्मू-कश्मीर विधानसभा दी नियमें सरबंधी कमेटी नै सदन च कम्मकाज ते प्रक्रियाएं सरबंधी मजूदा नियमें च लोडचदे संशोधन करने लेई अपनी मंजूरी देई दित्ती ऐ। आकाशवाणी जम्मू दे संवाददाता दी रिपोर्ट मूजब, इस सरबंधी च कल विधानसभा दे जम्मू परिसर च स्पीकर अब्दुल रहीम राथर हुंदी प्रधानता तैह्त इक बैठक लाई गोई। कमेटी दे सदस्यें, सदन दे बवस्थित ढंग्गै सिर कम्मकाज लेई नियमें च लोडचदे संशोधन करने बारै अपनी सैह्ताती जताई।

<><><><><><>

Guru-Ravidass

अज्ज गुरु रविदास जयंती मनाई जा करदी ऐ। उनेंगी भक्ति आंदोलन च प्रमुख थाहर हासिल ऐ। उंदी जयंती गी खासतौर पर उत्तर भारत च मनाया जंदा ऐ। अज्ज दे दिन लोक गुरु रविदास हुंदी सिक्खेआएं, समाज सुधार लेई उन्दे आसेआ कीते गेदे कम्मं ते जाति आधारित फर्कोफर्की गी खत्म करने लेई कम्म करने लेई उनेंगी चेत्ता करदे ना। गुरु रविदास हुंदी जयंती जम्मू च बी पूरी धार्मिक श्रद्धा कन्नै मनाई जा करदी ऐ। उपराज्यपाल मनोज सिन्हा होरें लोकें गी गुरु रविदास जयंती दियां शुभकामनां दित्तियां ना। उनें आखेआ जे गुरु रविदास जी हुंदा जीवन ते उंदी सिक्खेआं स्हाडे सारें लेई प्रेरणा दा स्रोत ऐ।

<><><><><><>

CS-Broadband

जम्मू-कश्मीर च राष्ट्री ब्राडबैंड मिशन दी अमलावरी गी रफ्तार देने दे मकसद कन्नै मुख सचिव अटल डुल्लू होरें सिविल सचिवालय श्रीनगर च 7मीं प्रदेश ब्राडबैंड कमेटी दी बैठक दी अध्यक्षता कीती जेह्दे च बक्ख-बक्ख मैहकमें दे अधिकारी शामिल होए। इस दौरान केई प्रमुख मामलें पर ध्यान केंद्रित कीता गेआ जिंदे च 4-जी तगर सब्बनें दी पुज्ज, 5-जी दी अमलावरी ते ब्राडबैंड नेट परियोजना शामिल ना। बैठक दौरान मुख सचिव होरें बक्ख-बक्ख मैहकमें बश्कार तालमेल दी जरूरतै पर जोर पाया तांजे अडचनें गी दूर करिए लक्ष्यें गी हासल कीता जाई सके।

<><><><><><>

Secy-Tourism

सैलसफा मैहकमे दियां आयुक्त सचिव यशा मुदगल हारें कल सिविल सचिवालय जम्मू च इक उञ्ची सतह दी बैठक लाइयै जम्मू-कश्मीर च प्रमुख जनैली शिडकें ते शिडकें कंडे उपलब्ध सुविधाएं ते शौचालयें बगैरा दी सहूलतें दा जायजा लैता। इस बैठक दा मकसद मुकामी यात्रिएं ते केंद्र शासित प्रदेश च बददी सैलानिएं दी गिनतरी दे चलदे उंदिएं जरूरतें गी हल करने दे मकसद कन्नै लाई गेई। आयुक्त सचिव होरें अफसरें गी आखेआ जे ओहू ढांचागत सुविधाएं गी बेहतर करने लेई कम्मे दी रफ्तार गी बदान। आयुक्त सचिव होरें प्रमुख सैलानी थाहरें जियां गुलमर्ग, सोनमर्ग, पहलगाम, पत्नीटॉप, सनासर, भद्रवाह ते दुधपत्थरी बगैरा च बुनियादी सहूलतें गी होर बेहतर करने लेई आखेआ तां जे उत्थे औने आहूले सैलानिएं ते मकामी लोकें गी कुसै चाल्ली दी असुविधा पेश नेई आवै।

<><><><><><>